

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

20 Juillet 2018

(06 Dhul-Qaddah 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « **Nous Létemps lors La Terre Limité.** »

Pour nous tous, nous voyage lors la terre li limité. Tôt ou tard nous pou bizin retourne vers nous Créateur et présente nous devant Li. Bane ki craigne Allah le plus zot ena nek ene souhait, c'est ki zot reste dans So l'obéissance - l'obéissance d'Allah - tout au long de zot la vies. Zot souhaite sa, afin pou éviter ki zot alle mort pendant ki zot dans désobéissance d'Allah parski le Saint Prophète Muhammad (saws) fine dire : « *Sak serviteur pou ressuscité pareil couma li fine mort (c.-à-d., dans l'état ki li fine mort).* » (Muslim).

Le Messenger d'Allah (saws) pé cause ici de nous l'état kan nous pou mort, soit en tant ki ene mécréant ou en tant ki ene croyant. Sak dimoune (Musulman) bizin donc cherche par tous bane moyens pou tenir li ferme dans so la foi (l'Islam) tout au long de so la vie lors la terre afin ki kan li pou mort, malgré ki so famille pou capave peut être plorer ki zot fine perdi ene proche, mais sa dimoune ki fine mort là li, li pou content pou retourne vers so Créateur.

Pour sa, li bizin :

(1) Croire dans parole Allah et de Hazrat Muhammad (saws).

Li tellement facile pour nous pou croire dans paroles dimounes. Si fer ene l'annonce ki à partir de demain pou ena ene hausse dans prix l'essence, commié d'entre nous pou presser zordi même pou alle rempli tank l'essence dans bane filling ?

Dans quatrième chapitre Quran Shareef, Allah dire nous : **« Allah, pas ena ene l'autre dieu apart Li. Li pou rassembler ou le Jour du Jugement, pas ena doute lors là. Ki parole plus vrai ki parole Allah ? »** (An-Nisa 4 : 88)

De sa verset là, li bien clair ki tout saki Allah et So Messenger (saws) fine prédire pou arriver très certainement. Zot bizin donc sûrs de bane paroles suivants :

« Tout dimoune pou vine ene témoin clair contre li-même, même si li présente so excuses. » (Al-Qiyama 75 : 15-16).

« Azordi, Nous fine scelle zot la bouche ; mais zot la mains pou cause avec Nous et zot lipié pou témoigner ki kitchose zot fine mériter. » (Yasin 36 : 66).

« Celui ki fine faire la plus petite quantité de bien, pou trouve li là, et celui qui fine faire la plus petite quantité de mauvais, pou trouve li là. » (Az-Zalzala 99 : 8-9).

Pas abandonne le Quran. Si zot délaisse li, zot pou récolter zis tristesse parski le Quran contenir nous guérison. Allah dire nous concernant le Quran : **« Nous faire dessane dans Quran saki (pou servi) bane ki ena la foi comme ene guérison et ene grâce. Mais pou bane ki faire du tort, sa seulement augmente zot la perte. »** (Bani Israël 17 : 83).

Et si nous tourne lé dos avec Quran, Allah dire nous : **« Et celui ki tourne lédos avec Mo message, li sûr pou gagne ene la vie misérable, et Nous pou amène li, au rassemblement, aveugle, Jour Jugement. »** (Taha 20 : 125).

Zot bizin conner ki sa Quran là fine être envoyé pour enlève nous tristesse parski dans même Surah, Allah dire nous : **« Nous pas fine faire Quran dessane lors toi pou donne toi la peine. »** (Taha 20 : 3).

(2) Nous bizin apprane zistoires de bane prophètes avant nous quitte sa lé monde ici-bas là.

Allah dire le Saint Prophète (saws) : **« Tout saki Nous raconte toi dans zistoires bane prophètes, Nous renforci to lécoeur avec sa. Là-dans to gagne la vérité et bane conseils, et li ene rappel pou bane ki ena la foi. »** (Hud 11 : 121).

Sa bane zistoires là zot en fait, remplies de leçons pour ki nous réfléchi lors là. Par exemple, la mer ki ti ouvert devant Hazrat Moussa (as) ou la réponse d'Allah à l'invocation de Hazrat Younous (as) depuis l'estomac d'ene poisson, sans compter bane paroles de Hazrat Ibrahim (as) kan ti pé alle jette li dans ene grand difé : **« Allah suffit pou moi... »**, et bien d'autres encore. C'est zot ki nous bizin prend comme modèles.

(3) Bane invocations (Dua).

Ene de bane z'armes ki pli redoutables et efficaces ki bane croyants ena à zot dispositions mais ki zot néglige servi c'est l'invocation (*Dua*). Et pourtant Allah Li-même ainsi ki So bane prophètes fine enseigne nous bane meilleurs paroles ki nous capave servi pour invoque Allah. Allah enseigne nous sa *Dua* là dans Quran Shareef :

« Ô nous Maître, pas laisse nous lé cœur prend le mauvais chemin après ki To fine guide nous. Accorde nous la grâce ki To tousél posséder, car c'est Toi le plus grand bienfaiteur. » (Al-Imran 3 : 9).

De plus, Allah dire: **« Le Messenger accepter message ki fine dessane de so Maître, et bane ki ena la foi aussi (accepter sa message là). Tous ena la foi en Allah, en So bane anges, So bane livres et So bane messagers. 'Nous pas faire aucune différence entre So bane messagers.' Et zot dire aussi : 'Nous fine écouter et nous fine obéir. Pardonne-nous, Ô nous Maître, parski c'est Toi ki nous bizin zoine en dernier.' »**. (Al-Baqara 2 : 286).

L'invocation (*Dua*) ki nous Saint Prophète Muhammad (saws) fine enseigne nous, li comme suite: **Ya muqallib al-qulub, thabbit qalbi 'ala deenika** - **Ô Toi Qui tourne bane les cœurs, affermi mo lé cœur dans To religion (l'Islam).**

(4) Conne l'importance pou reste ferme dans l'obéissance d'Allah.

Nous bien bizin réfléchi lors bane paroles d'Allah ki informe nous d'ene l'étape ki bien marquant et éprouvant pou nous dans nous la vie. C'est **Sakraat** (L'état kot

nous l'âme détache définitivement de nous le corps physique pour l'au-delà). Nous bane proches pou malgré zot, impuissants sa jour-là, mais anou guetter saki Allah dire nous dans Quran Shareef :

« Bane ki dire : 'Nous Maître, c'est Allah', ensuite suive le droit chemin, bane anges dessane lors zot (et dire zot) : 'Pas craindre nannié et pas chagrin, mais gagne bon nouvelle Paradis, ki fine promesse ou.' Nous ou alliés dans la vie ici-bas, et dans la vie future. Ou pou gagne saki ou envie ; et là-dans ou pou gagne séki ou demander : ene réception, de la part de Quelqu'un ki pardonner et gracier.' » (Fussilat 41 : 31-33).

Guette zot-mêmes l'importance pou reste ferme et pou prend Allah comme nous Protecteur et kot nous bizin ena confiance en So Toute Puissance et So l'existence en tant ki nous Unique Créateur.

(5) Conne la valeur de sa le monde là.

Le prophète Muhammad (saws) fine dire: *« Sa lé monde ici-bas là par rapport à la vie future li pareil couma le mouvement d'ene d'entre zot ki trempe so lé doigt dans ene fleuve, et li guetter saki li capave retirer de sa. (C.-à-d., saki li capave retirer de sa fleuve là avec zis ene lédoigt ki li fine tremper là-dans – en d'autres mots, nannié ditout !)* » (Muslim). Sa amène nous à réfléchir à ki point sa lé monde là li nannié ditout comparé à saki Allah fine réservé pou nous dans l'au-delà.

Allah dire nous dans Quran Shareef: **« Ô ou ki ena la foi ! Ki arrive ou ? Kan dire ou sorti pou faire la guerre pou cause Allah, ki faire ou reste collé à sa la terre là ? Eski ou préfère la vie lors la terre à la vie future ? Mais jouissance la vie lors la terre, li minime en comparaison avec la vie future. »** (At-Tauba 9: 38).

(6) Nous bizin rappelle nous de la mort et de nous tombe.

Imagine zot lé corps, enveloppé dans ene la toile blanc, allongé dans ou la caze, attendant ki ou être placé dans ou *Janaza*. Le long du trajet vers cimiterie, ou pou être accompagné de ou bane proches, ou richesse et ainsi ki ou bane actions. Mais ene fois ki pou place ou dans ou tombe, deux là-dans pou retourner : ou bane proches et ou richesse. Ou pou retrouve ou à ce moment-là avec ou bane actions seulement. C'est à ou pou choisir, tanque ki ou ena le temps, ki-ki actions pou accompagne ou dans ou tombe.

Hasan Al-Basri (ra) fine dire : « Ô garçon Adam, to en vérité zis pour quelques jours. Kan ene jour aller, ene partie de toi aussi aller ensam. »

(7) Zot bizin conné ki aucaine de nous bane actions pas pou capave profite ou faire du tort à Allah dans aucaine façon.

Nous bane z'efforts pou reste dans l'obéissance d'Allah pas pou profite à personne d'autre excepter nous-mêmes. Dans bane Hadiths Qudsi (sacrés), Allah fine : « Ô Mo bane serviteurs ! Ene tort ki vine de zot pas pou capave atteindre Moi, zot pas pou capave faire Moi ditort ditout. Et zot pas pou capave non plus faire Moi ene bien, ni profite Moi dans n'importe ki façon. »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, si tous ti aussi pieux ki lé cœur de l'homme le plus pieux d'entre zot, sa pas ti pou grandi Mo royaume dans n'importe ki façon ! »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, ti aussi pervers ki le plus pervers parmi zot, sa pas ti pou diminuer en nannié Mo royaume. »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, zot tous ti lever lors ene sel place pour faire Moi ene demande et si Mo ti accorde à sakaine d'entre zot saki li fine demander, sa pas ti pou diminuer en nannié saki Mo possédé, pas plus ki ene z'aiguille ki enforcer dans la mer pas diminuer (en nannié l'étendu de la mer). » (Muslim, Tirmidhi, Ibn Majah).

Alors demande zot-mêmes, si mo reste dans l'obéissance d'Allah, à ki sa pou profiter ? Pareil, si mo désobéir Allah, ki pou être blâmer et pou retrouve li en difficulté ? Le choix li appartenir à zot ; c'est à zot de décider !

Ki Allah aide nous tous pou nous rappelle nous de la mort, et pou faire tout saki en nous pouvoir pour vivre nous la vie dans l'obéissance d'Allah afin ki nous la vie présente et nous la vie future zot sécurisé contre tous bane formes de mal ki exister et ki nous la vie li protégé contre le mécontentement d'Allah aussi. Nous l'existence dépende de sa ! *Insha-Allah, Ameen.*